

E tāua tele molimau i le vaega o faamasinoga tau soligatulafono i totonu o Niu Sila. E latou te tuuina atu ni molimau tāua i se suesuega ma se mataupu ua oo i le faamasinoga, e fesoasoani ai ina ia faamautinoa ua faasalaina le tagata tonu na faia le soligatulafono.

E tāua le mauaina o le fesoasoani e talafeagai lelei ma oe. E iai faalapotopotoga i lou vaipanoa e mafai ona ofoina atu fesoasoani faapitoa tau i faalogona loloto o loo tou moomia, ma isi uma fesoasoani aogā o loo mafai ona tou maua. Vili le Laina o Faamatalaga mo Ē ua Afaina i le 0800 650 654 e saili ai mo isi faalapotopotoga o loo latalata ane ia te oe.

*Tagai i le faaiuga o lenei pepa mo fesootaiga autū faapea ma le lisi o upu ma o latou uiga.*

---

### Aiā tatau a ē ua afaina

E iai aiā tatau a i latou ua afaina mai ni soligatulafono e tutupu i Niu Sila. Afai o ē ua afaina o se tamaitiiti poo se tagata talavou, e tutusa pau lava la a latou aiā tatau ma o latou mātua poo le tagata ua tofia e le tulafono e vaaia i latou.

E iai lau aiā e tatau ai ona ta'ū atu ia te oe auunaga e mafai ona e maua ai se fesoasoani, ia fai ma logo atu oe i le faagasologa o le faamasinoga, ma ia faailoa atu foi poo ā mea e tatau ona e iloa pe a e alu atu i le faamasinoga.

E iai lau aiā tatau e te ta'ū atu ai i le faamasinoga poo ā aafiaga ua oo ia te oe ona o le soligatulafono. Afai ua e afaina ona o se solitulafono na faia e se tamaitiiti poo se tagata talavou, e iai lau aiā tatau e te auai i se fonotaga faaleaiga ma fai sou manatu i se mea e tatau ona fai.

I nisi tulaga, e iai le aiā a oe poo le tagata o loo tulai mo oe, e fai ai se manatu i mea e pei o le taofia ona faailoa le igoa, totogi tupe e tatala ai i tua se tasi e faatalitali ai lona faamasinoga, faasalaga saisaitia i le aiga, poo le palola.

E tatau i tagata ofisa o le faamasinoga, o leoleo, ma soo se tasi o loo aofia i lenei mataupu, ona latou faatino atu ia te oe se auunaga e faia ma le faatamalii, agaalofa ma le faaaloalo. E iai lau aiā tatau i faamalumaluga faalilolilo.

Faitau le Taiala mo Ē ua Afaina (Victims Code) mo nisi faamatalaga e tusa ai o au aiā tatau ma le auala e tatau ona feutagai ai ma oe. O loo iai i la matou upega tafailagi o le [victimsinfo.govt.nz](http://victimsinfo.govt.nz) faatasi ai ma isi faamatalaga aogā.

Afai e te manatu e lē o utagiaina au aiā tatau, pe e lē o faamalieina oe i le ituaiga o auunaga o loo e manaomia, e mafai ona fai sau faaseā. Asiasi i le [victimsinfo.govt.nz](http://victimsinfo.govt.nz) pe vili le Laina o Faamatalaga mo Ē ua Afaina i le 0800 650 654.

---

### Le suesuega

Pe a lipotia se soligatulafono, o le a faatulaga mai loa se leoleo e nafa ma lau mataupu. O le a talanoa mai lena leoleo ia te oe ma lou matua poo le tagata o loo vaaia oe, ma ta'ū mai poo ai e mafai ona e talanoa i ai mo se fesoasoani.

O le a talanoa foi le leoleo i soo se mataupu tau i le puipuiga saogalemu mo oe, ma le auala e faatino ai.

### FAATALANOAGA

I se vave e mafai ai pe a uma ona lipotia le soligatulafono, o le a manao le leoleo e faatalanoa oe ma faamauina sau faamatalaga. E fua le auala e fai ai le faatalanoaga, i le ituaiga o soligatulafono na faia. O le a faamatala atu e le leoleo lena mea ia te oe.

E mafai ona pue lau faamatalaga i se video, pe tusi foi. O le a avatu ia te oe se kopi o lau faamatalaga tusitusia. E tusa lava pe ua uma ona fai sau faamatalaga, ae atonu o le a manaomia pea ona e taliina nisi o fesili i totonu o le falefaamasino.

E tāua lou talanoa i au lava upu e tusa ai o le mea na tupu, e tatau ai ona e lē talanoa atu i lou aiga ma isi tagata e uiga i le soligatulafono a o lei faia lau faatalanoaga.

.....

E taumafai lava i latou o loo faia faatalanoaga e faamautinoa ia na o le tasi lava se faatalanoaga e faia ma oe, ae o nisi taimi atonu e manaomia ai ona faia ona toe fai se isi au faatalanoaga.

A o fai le suesuega, o le a talanoa atu foi leoleo i isi molimau ma aoao mai faamaoniga. Afai e lava ni faamaoniga latou te maua, o le a loka loa se isi ma molia i se soligatulafono.

#### **TOTOGI TUPE E TATALA AI I TUA E FAATALITALI AI LE FAAMASINOGA**

Afai ua loka se tasi, e ono mafai ona toe tatala mai i tua seia oo i le aso e alu atu ai mo lona faamasinoga. E ta'u lona faiga o le tologi o tupe e tatala ai i tua e faatalitali ai le faamasinoga (bail). O nisi taimi e iai tuutuuga i le poo fea e tatau ona nofo ai lea tagata ma o le ā le taimi e tatau ai ona iai i le fale. Afai e manatu leoleo o loo iai i se tulaga lamatia oe ma isi tagata o le komiuniti, atonu la e taofia ai pea le tagata lea i le vaavaaiga a leoleo seia aulia le taimi e tulai ai i luma o le faamasinoga, o ina e mafai ai ona toe talosaga mo le tologiina o se tupe e tatala mai ai i tua e faatalitali ai le aso o lona faamasinoga.

Afai ua e afaina ona o se soligatulafono matuia na faia, e mafai ona fesiligia oe, o lou matua poo le tagata o loo vaaia oe, i ni tou faalogona e tusa ai o le tatala mai tua o le tagata e faatalitali ai lona faamasinoga pe a tologi se tupe, ma o le a logo atu foi outou pe a oo ona fai lona mea pe leai foi. (O loo ta'u mai e le lisi o upu ma o latou uiga i le faaiuga o lenei pepa o faamatalaga, poo le ā le uiga o le soligatulafono matuia.)

O le a fesiligia foi ou mātua poo le tagata o loo vaaia oe pe mananao e faamau o latou suafa i le lisi ua lesitala mo le logoina o ē ua afaina, ina ia faailoa ai foi ia i latou le mea ua tupu pe a uma ona lau le faasalaga o le tagata solitulafono. E mafai ona e lesitala lava oe mo le mauaina o na faamatalaga pe afai ua 17 tausaga o lou matua. A fia silafia atili nisi faamatalaga i lona itu, tagai i isi a matou pepa o faamatalaga i le [victimsinfo.govt.nz](http://victimsinfo.govt.nz)

#### **FAAMATALAGA O AAFIAGA O LĒ UA AFAINA**

Afai o loo e afaina ona o le soligatulafono, o le a fesiligia oe ma ou matua poo le tagata o loo vaaia oe pe tou te mananao e fai se faamatalaga i aafiaga o ē ua āfaina. E ta'u atu ai i le faamasinoga pe ua faapefea i le soligatulafono na fai ona aafia ai oe. O le leoleo o loo nafa ma lau mataupu, o le Toomaga mo Ē Puapuagatia poo se isi lava vaega poo se faalapotopotoga fesoasoani, e mafai ona latou fesoasoani atu ia te oe i le tusiaina o lenei faamatalaga.

O nisi taimi, e tusa lava poo le ā le mae'ae'a o suesuega e fai, ae lē o lava ni faamaoniga e ono loka ai se tasi ma oo ai le mataupu i le faamasinoga. E lē faapea ai sa lei talitonuina lau faamatalaga.

---

### **Fesoasoani**

E mafai ona e maua se fesoasoani a o faia suesuega i lau mataupu. E mafai e oe poo ou matua poo le tagata o loo vaaia oe ona faafesootai le Laina o Faamatalaga mo Ē ua Afaina i le 0800 650 654 e saili ai mo isi faalapotopotoga fesoasoani i lou vaipanoa. Poo lou vili i le Toomaga mo Ē Puapuagatia (Victim Support) i le 0800 842 846 – E mafai e le Toomaga mo Ē Puapuagatia ona ofoina atu fesoasoani ia i latou uma o loo avea ma molimau o le faamasinoga faapea ma tagata o loo fesoasoani i na molimau.

#### **LEOLEO O LOO NAFA MA LE MATAUPU**

E mafai ona e telefoni pe imeli atu i soo se taimi i le leoleo o loo nafa ma le mataupu e siaki, poo le ā se tulaga ua oo i ai le mataupu.

#### **FAUFAUTUA A LE FAAMASINOGA MO Ē UA AFAINA (FAUFAUTUA)**

Afai o loo e afaina mai le soligatulafono, o le a faafesootai atu oe e se tasi o faufautua a le faamasinoga mo ē ua afaina, pe a mae'a le uluai taimi o le a tulai ai lē ua molia i luma o le faamasinoga.

O le galuega a lea faufautua, o le ta'u atu ia te oe mea o loo tutupu i lau mataupu ma mea e mafai ona e faia. E latou te ta'u atu foi ia te oe poo fea e te maua mai ai se fesoasoani tau i faalogona loloto ma fesoasoani tau tupe. O le tamaitusi o auunaga a le *Faamasinoga mo ē ua afaina i soligatulafono* o loo iai le tele o isi faamatalaga e uiga i le auunaga.

E mafai ona e faafesootai tuusa'o lau faufautua, pe faauala atu i le Laina o Faamatalaga mo Ē ua Afaina i Solitulafono i le 0800 650 654.

#### **MEA E FESOASOANI I MOLIMAU TALAVOU**

E mafai e molimau talavou ona maua ni mea e fesoasoani ia i latou e pei o siata, o ata lapopoa (posters) ma tusi ina ia latou malamalama ai i le faagasologa o le faamasinoga. Fesili atu i lau faufautua mo nei mea.

.....

---

## TAIALA MO OFISA MA FAALAPOTOPOTOGA A LE MALO

E iai taiala mo ofisa ma faalapotopotoga a le malo, o loo galulue faatasi ma tamaiti molimau ma tagata o loo lagolagoina i latou. E mafai ona e tagai i nei taiala i luga o le [victimsinfo.govt.nz](http://victimsinfo.govt.nz)

## FESOASOANI TAU SELENI

O loo maua fesoasoani tau seleni mo i latou ua afaina mai ni soligatulafono matuia (o loo ta'u mai e le lisi o upu ma o latou uiga i le faaiuga o lenei pepa o faamatalaga, poo le ā le uiga o le soligatulafono matuia). O nei fesoasoani tau tupe e mafai ona toe faola ai nisi tupe faaalu a o fesagaia aafiaga mai le solitulafono.

Ina ia iloa pe mafai ona e maua se fesoasoani tau seleni ae pe fia foi se mea e te maua, tagai i le [victimsinfo.govt.nz](http://victimsinfo.govt.nz) pe vili le Toomaga mo Ē Puapuagatia i le 0800 842 846.

E ono mafai e molimau ona tāpā mai le faamasinoga latou tupe e fesoasoani i tupe faaalu. Fesili i lau faufautua mo se fesoasoani.

---

## I le faamasinoga

O le a iai taimi e tulai ai lē ua molia (le tagata ua tuua'ia i le soligatulafono) i luma o le faamasinoga, e pei o le taimi e tulai ai e tali i le ioe poo le tetee i ona moliaga, pe tulai foi a o iloilo e le faamasino faamaoniga o le mataupu.

Afai e ioeina e lē na molia moliaga, o le a lau ai lava i lena aso lona faasalaga, pe o le a faatulaga se isi aso e lau ai le faasalaga. O le a lē manaomia oe e toe avatu nisi faamaoniga.

Afai e tetee le tagata i moliaga, o le a faagasolo loa le faamasinoga, ma o le a manaomia ona avatu sau faamaoniga o se molimau (tagai i le *Avea ma molimau*).

## AOAOGA O FAAMASINOGA MO MOLIMAU TALAVOU

E ono umi ma lavelave le faagasologa o se faamasinoga. E lē tutusa ma faamasinoga i ata o le televise. Afai o loo fai sau molimau, e mafai ona e talosaga mo le Aoaoga o Faamasinoga mo Molimau Talavou (Court Education for Young Witnesses). O se polokalame ua ofoina mai e tagata faufautua i ē ua afaina, mo molimau talavou UMA i totonu o faamasinoga o tagata matutua (se'i vaganā i latou o loo molia). E mafai e soo se molimau talavou poo le tagata e lagolagoina o ia ona faafesootai le latou faufautua i le falefaamasino e fesili i ai mo lenei auaunaga.

Afai ua e faatalosagaina le Aoaoga o Faamasinoga mo Molimau Talavou, o le a faafesootai atu oe e lau faufautua i le tolu vaiaso a o lei amataina le mataupu i le faamasinoga. O le a ia faamatala ia te oe ma lou matua poo le tagata foi o loo tausia oe, mea uma e fai i totonu o le falefaamasino, poo ai e nofo i fea le pito ae o ai foi e faia lea mea ma lea mea. E mafai foi ona lua o e asiasi i le falefaamasino.

E mafai ona e faafesootaia le faufautua a le faamasinoga mo ē afaina i le tou pitonuu e ala atu i le Laina o Faamatalaga mo Ē ua Afaina i le 0800 650 654.

## SOLIGATULAFONO A TAGATA TALAVOU

Afai o le soligatulafono na faia e se tamaitiiti poo se tagata talavou, e ese la le auala o le a faafae ai le mataupu atoa, auā o le a faagasolo i le faamasinoga mo talavou. E ono aofia ai se fonotaga faaleaiga. Afai o oe lea e afaina mai i le soligatulafono, o le a valaaulia oe e te auai i le talanoaga. E mafai foi ona e auai i le fofogaina o le mataupu i le Faamasinoga mo Tagata Talavou. E mafai ona lua o ma sau tagata e lagolagoina oe i le fonotaga faaleaiga faapea foi i le falefaamasino.

O le a faamautinoa e le Sooupu (Youth Justice Coordinator), o ia foi e galue mo le faalapotopotoga o le Child, Youth and Family, ua e silafia le mea o loo tupu i le mataupu ae poo le ā foi se mea e manaomia ona e faia.

O nisi mataupu matuiā o solitulafono a tagata talavou e faagasolo i le faamasinoga mo tagata matutua.

---

## Avea ma molimau

O tagata molimau o ni vaega tāua o mataupu o faamasinoga. E mafai ona latou tuuina atu ni faamaoniga matuā sili ona tāua o le mea na tupu.

## A O LEI FAIA LE FAAMASINOGA

Afai o loo manaomia ona avea oe ma se molimau, o le a logo atu oe e le leoleo o loo nafa ma le mataupu poo le faufautua a le faamasinoga mo ē ua afaina, e tusa ai o le taimi ma le nofoaga o le a manaomia ai oe i le faamasinoga. O le a momoli atu lava i lou maota se tusi aloaia.

A o lei fofogaina le mataupu i luma o le faamasinoga, o le a lua feiloai ma le leoleo o loo nafa ma le mataupu, ona faali lea o le video lea sa pue ai lau faatalanoaga na fai, e toe faamanatu ai ia te oe au upu na fai i lau faatalanoaga. O le a talanoa atu foi ia te oe i le auala e tatau ai ona faamatala atu faamaoniga o lau molimau.

---



**Televise i le potu faamasino.** E ono mafai ona faali lau molimau i luga o se ālā televise/video o loo ta'i mai i se isi potu, ina ia lē tau manaomia ai oe i totonu o le potu faamasino. O le a mafai ona e tilotilo atu i le faamasino ma loia taitasi pe a fai mai a latou fesili ia te oe, ae lē mafai ona e iloa atu nisi lava tagata.



**I tua o se pupuni.** Afai o loo fai lau molimau i totonu o le potu faamasino, e mafai ona faatulaga se pupuni i luma o oe ina ia lē mafai ona e tilotilo atu i lē ua molia. O le a mafai lava ona e iloa atu isi tagata i totonu o le potu faamasino.



**E lē o iai se pupuni.** E mafai ona e filifili pe fai mai lau molimau i totonu o le tamai pusa ua faatulaga mo molimau ma iloa atu ai oe e tagata uma o loo i totonu o le potu faamasino.

Ta'u atu i le leoleo o loo nafa ma lau mataupu, o lau faufautua, poo lau tagata fesoasoani, pe afai e te manaomia ni mea faalogo, se mea e feaveai ai oe i totonu o le potu faamasino, poo se faaliliu upu mo oe i le taimi o le faamasinoga.

#### **FAIGA O LE MOLIMAU**

E mafai ona feiloai atu le leoleo o loo nafa ma le mataupu poo lau faufautua, ia te oe ma lou aiga i totonu poo fafo mai o le falefaamasino. O le a latou avatu outou i se isi potu faatalitali, ina ia tou lē fetau ai ma lē ua molia poo tagata o loo lagolagoina i latou. Ae atonu lava o le a tou vāai i ai i totonu poo se isi vaipanoa o le fale faamasino.

Afai o oe o se molimau, o le a fesiligia oe i le mea na tupu, pe fesili mai poo ā ni mea o e iloa i le soligatulafono.

A o lei faia lau molimau, o le a e tauto e te ta'ua le mea moni. E mafai ona e filifili e fai sau tautoga (o se folafolaga faaletapuaiga) pe fai sau faamautinoaga (o se folafolaga faasamasamanoa).

Afai ua uma ona pue i le video lau uluai faatalanoaga, e masani ona toe faaali i le faamasinoga. Ona faatonuina lea o oe e tali soo se fesili mai le loia a le malo faapea le loia a lē ua molia. E ono fesiligia foi oe e le faamasino.

E lē faatagaina le au tusitala e faailoa le igoa o se tagata talavou o loo fai ma molimau, poo soo se faamatalaga e ono faigofie ai ona mataulia o ia.

E tāua lou saogalemu. Soo se taimi lava e te popole ai mo lou saogalemu a o e iai i le falefaamasino, talanoa atu i se leoleopoo i latou o loo leoina le saogalemu o le faamasinoga (sekulakī).

#### **ISI AUALA E FILIFILI AI MO LE FAIGA O LE MOLIMAU**

A o faia lau molimau, e mafai ona nofo atu i ou autafa sou matua poo le tagata o loo vaaia oe poo se isi tagata e lagolagoina oe.

E tolu auala aloaia e mafai ona fai ai lau molimau i le faamasinoga: e faaali mai se ālātelevise o loo iai iina, poo tua o se pupuni, pe fai lava e aunoa ma se pupuni.

---

## Le iuga ma le faasalaga

Pe a uma le faamasinoga, ona iloa lea pe faamaonia pe leai le moliaga o lē na molia. (I nisi mataupu – e pei o le lē mafai ai e le vasega o faatonu ona faia se faaiuga – e ono toe faia se isi faamasinoga.) Afai e lē faamaonia le moliaga, e lē faapea ai sa lei talitonuina lau molimau. O mataupu tau faamasinoga o ni mataupu e fua lava i le tulafono ma molimau.

Afai ua lē faamaonia le moliaga, ua toe saoloto loa lē na molia. Atonu o se mea e te lei faatalitalia ma atonu e te fia talanoa atu ai, ma lou matua poo lē o loo tausia oe, i lau faufautua poo se tagata fesoasoani e tusa ai o lenei mea.

Afai ua faamaonia le moliaga, atonu o le a lau ai lava i lena aso le faasalaga, pe o le a faatulaga se isi aso e lau ai le faasalaga.

### APILI

E iai uma i le loia a le malo ma le tagata na faia le solitulafono a la aiā tatau e toe apili ai le iuga ma le faasalaga. O lona uiga o se isi faamasinoga e maua atu o le a toe silasila i le mataupu. Afai e tupu lenei mea, o le a logo atu oe e le loia a le malo e uiga i le faagasologa o lena faamasinoga.

### LAUINA O LE FAASALAGA

E tele mea e tatau ona silasila i ai le faamasino a o avatu le faasalaga o le tagata solitulafono, e pei o le saili poo ā faasalaga na tuuina atu i isi tagata na faia foi soligatulafono faapea, ma silasila foi i lipoti e uiga i le tagata ua solitulafono, ma se faamatalaga e tusa ai o aafiaga ua oo i lē ua afaina ona o le soligatulafono.

Afai e talia e le faamasino, e mafai e oe ma lou matua poo le tagata o loo tausia oe ona faitau atu i totonu o le falefaamasino i le taimi e faalau ai le faasalaga, lau faamatalaga atoa poo se vaega, e tusa ai o aafiaga ua oo ia te oe ona o le soligatulafono. Talosaga atu i lau faufautua a le faamasinoga mo tagata aafia, poo le leoleo o loo nafa ma lau mataupu, e na te faaoo atu lau talosaga i le faamasino.

---

## Mae'a le faamasinoga

Afai ua faamaonia le soligatulafono, o faasalaga nei e ono faasalaina ai le tagata solitulafono, e pei o le faafalepuipui, se faasalaga e tuli i tua i le komiuniti/nuu poo se sala tupe foi.

## LISI UA LESITALA MO LE LOGOINA O Ē UA AFAINA

Afai ua e afaina ona o se soligatulafono matuia na faia, e mafai e ou mātua poo le tagata o loo tausia oe ona faamau o latou suafa i le lisi ua lesitala mo le logoina o ē ua afaina, ina ia mafai ai ona latou maua faamatalaga e uiga i le tagata solitulafono, poo fea ua oo i ai le faagasologa o le faamasinoga, pe o tatala mai i tua mo se taimi lē tumau le tagata solitulafono ma pe ua magalo mai i tua i le palola. E mafai ona e lesitala ai pe afai ua 17 tausaga lou matua.

O le a talanoa atu ia te oe le leoleo o loo nafa ma le mataupu, e tusa ai o le faagasologa o le faamasinoga. E tatau ona sa'o lelei ou faamaumauga mo le aumaia o faamatalaga mai le Lisi ua resitala mo le logoina o ē ua afaina

---

## Fesootaiga autū

E iai se lagolagosua poo se fesoasoani mo oe i soo se tulaga lava o loo e iai i le faagasologa o le faamasinoga mo solitulafono, faapea ma se lagolagosua mo oe lava, ina ia mafai ona e fesagaia āuga o le solitulafono.

O faamaumauga nei e fesootai ai i nisi o auunaga autū mo ē ua afaina ma tagata ua aafia ona o le soligatulafono. E te maua nisi faamatalaga e uiga i auunaga pe a vili le Laina o Faamatalaga mo Ē ua Afaina i le 0800 650 654 (9am i le 6pm mai le Aso Gafua i le Aso Faraile) pe asiasi i le [victimsinfo.govt.nz](http://victimsinfo.govt.nz)

### ACC

[acc.co.nz](http://acc.co.nz)

0800 101 996 Laina o Fesoasoani mo Talosaga

0800 735 566 Laina o Fesoasoani mo Talosaga Ma'ale'ale  
(mo ē ua afaina mai sauāga i feusuaiga faamalosi)

### Faufautua a le faamasinoga mo ē ua afaina

0800 650 654 Laina o Faamatalaga mo Ē ua Afaina

### Matagaluega o Falepuipui

04 460 3000

[corrections.govt.nz](http://corrections.govt.nz)

### Komiti o le Palola a Niu Sila

0800 PAROLE (727 653)

[paroleboard.govt.nz](http://paroleboard.govt.nz)

### Fesoasoani mo oe lava

Tagai i le [victimsinfo.govt.nz](http://victimsinfo.govt.nz) poo le vaega i le tusi telefoni o loo iai auunaga o ni fesoasoani mo oe lava

## Leoleo

E mafai ona e maua le ofisa o leoleo i lou vaipanoa i le [police.govt.nz](http://police.govt.nz) poo itulau lanu moana i le pito i luma o le tusi telefoni

## Toomaga mo Ē Puapuagatia

0800 VICTIM (842 846) 24 itula i le aso  
[victimsupport.org.nz](http://victimsupport.org.nz)

## Sulufaiga mo Tina/Tamaitai

0800 REFUGE (733 843) 24 itula i le aso  
[womensrefuge.org.nz](http://womensrefuge.org.nz)

## Laina o gagana o auunaga faaliliu upu

0800 656 656  
9am–6pm Aso Gafua-Aso Faraile, 9am–2pm Aso Toonai

## Lisi o upu ma o latou uiga

### Totogi tupe e tatala ai i tua e faatalitali ai le faamasinoga

Pe a toe tatala i tua e leoleo se tasi o loo molia i se soligatulafono faatasi ma tuutuuga e ao ona latou tulai i luma o le faamasinoga.

### Faufautua mo ē ua afaina mai sauaga i feusuaiga faamalosi

O se sui o le Matagaluega o Faamasinoga e mafai ona ia faamatala le faagasologa o le faamasinoga ma tauiologolo i latou ua afaina e tusa ai ma le faagasologa o le latou mataupu.

### Lē ua molia

O le tagata o loo tuua'ia i le soligatulafono.

### Fasioti tagata

Pe a fasioti e le isi tagata le tasi tagata.

### Lē ua solitulafono

O le tagata ua faamaonia lana solitulafono. (A o lei faamaonia le solitulafono o loo tuua'ia ai se tasi, e ta'ua lena tagata o 'lē ua molia'.)

### Palola

Pe afai ua tatala i tua le tagata solitulafono mai le toese ae foi mai e nofo faatasi ma tagata lautele ma tuli faauma ai lona faasalaga. E iai tuutuuga patino e tatau ona latou usitaia.

## Faaleleiga

O le faaleleiga e tuu atu ai le avanoa i ē ua afaina e ta'u atu i lē ua solitulafono poo ā aafiaga ua oo ia i latou, e ta'u atu pe faapefea ona toe faaleleia le mea ua afaina, ma amata ona toe foia nisi o aafiaga ua iai talu ai le soligatulafono na fai. O se feiloaiga lea e ta'ua o le talanoaga mo se faaleleiga.

## Soligatulafono matuia

- O se soligatulafono o tau feusuaiga poo se faaoolalima matuia.
- O se soligatulafono ua oo ai i ni manu'aga matuia pe iu i le maliu o se tasi.
- O se soligatulafono ua oo ai i lē ua afaina lagona fefe i taimi uma ma ua lē saogalemu mo ia poo nisi foi o lona aiga.

## Lisi ua lesitala mo le logoina o ē ua afaina

O se lisi ua malupuipua, e faaogā e ofisa o le faamasinoga mo soligatulafono, ina ia tauiologolo ai pea ē ua afaina i faamatalaga e uiga i le tagata solitulafono, e pei o le faailoa atu poo fea ua oo i ai le mataupu i le faamasinoga, poo tatala i tua mo se taimi lē tumau le tagata solitulafono, ae o afea foi e ono palola ai le tagata solitulafono.


Lesitala ou faamaumauga i le leoleo o loo nafa ma le mataupu.

## Faamatalaga o aafiaga a lē ua afaina

O se faamaumauga o aafiaga ua oo i lē ua afaina ona o le soligatulafono. E masani ona tusinga lena faamatalaga o aafiaga, ae mafai foi ona faaofia ai ma ni ata e pue, ni ata e tusi, poo ni solo e fatu. E tatau ona iloilo e le faamasino lena faamatalaga o aafiaga, pe a faia le faasalaga o lē ua solitulafono. E mafai e le tagata ua afaina ona faitau atu lena faamatalaga o ona aafiaga i le faamasinoga a o lei lauina mai le faasalaga.

## Le potu faamasino

O loo faailoa atu i lenei ata se faataitaiga o le faatulagaga o se potu faamasino, ma tagata e te ono vaaia ai iinā.



1. **Faamasino** e puleaina le faamasinoga. O latou e faia le faaiuga pe faamaonia le solitulafono a lē ua molia, ae afai e iai se vaega o faatonu (jury), o latou la na e faia le faaiuga.
2. **Lesitala** e fesoasoani i le faamasino ma faamautinoa o loo tausisia faagasologa tumau a le faamasinoga.
3. **Vasega o Faatonu** e to'a 12 tagata e iai, ma o latou ia e faia le filifiliga pe faamaonia le solitulafono a lē ua molia.
4. **Loia a le malo** e tu mo le ofisa a le Loia Sili na te faatautaia le mataupu ma folasia atu le moliaga faasaga i lē ua molia.
5. **Au tusitala** o le au faasalalau o loo lipotia le mataupu.
6. **Loia a lē ua molia** e tulai e fai ma sui o lē ua molia.
7. **Lē ua molia** o le tagata o loo tuua'ia i le soligatulafono.
8. **Faafeao a le pagota** e iai faatasi ma lē ua molia.
9. **Nofoaga mo le lautele** o iina e mafai ona nofoia e tagata lautele ma aiga o ē ua afaina, ma o inā foi e mafai ona nonofo ai molimau pe a uma ona fai a latou molimau.
10. **Faufautua** e fesoasoani i le molimau ina ia malamalama i le faagasologa o le faamasinoga. Atonu e lē o taimi uma o le a latou iai pea i totonu o le potu faamasino.
11. **Tagata e lagolagoina le molimau** o le tagata ua malie le faamasino e mafai ona fesoasoani atu i lē o molimau i le taimi o le faamasinoga.
12. **Molimau** e fai lana molimau i le mea na tupu poo se mea o loo ia iloa e faatatau i le soligatulafono.